

kontuola

KONTUOLA, Idolaz elkarte, ANTZUOLA. Kazetaria: Marijo Deogracias **Erredakzio kontseilua:** Miren Anduaga, Gotzon Iparragirre, Patxi Kortabarria, Jone Larrañaga **Testuen zuzenketak:** Maripi Laskurain, Lierni Legorburu **Telefonoa eta faxa:** 76 65 08, Herri ikastetxea.

Antzuolako hamabostekaria, 10 zenbakia. 1998ko otsailak 6.

Bake Epaitegia eguenero udaletxean

Oñatiarra eta bilbotarra dira epaitegiko langile berriak

Urtarrilaren 22an jarri zen martxan "Bake epaitegietako idazkaritzen elkarte". Elkarte honek Antzuola, Elgeta eta Urretxuko bake epaitegietako lanak egingo ditu. Antzuolan eguenero arituko dira Amaia Arrazola, oñatiarra, eta Asun Llorente, bilbotarra, Bake Epaitegiko lanak egiten.



J


aiotza zein ezkontza agiriak, heriotza agiriak, edota izen aldaketak egitea izango da, beste batzuen artean, Amaia eta Asunen lana. Udale-

txean egongo dira eguenero goizeko 9etatik 14:00ak arte. Orain arte lan hauek udaletxeko langileek egiten zituzten baina hemendik aurrera, Eusko Jaur-laritzak horretarako bidali dituen bi pertsona hauek arituko dira.

Astelehen, eguazten eta eguakitzetan Urretxun, martitzenetan Elgetan eta egueneroan Antzuolan izango dira eta nahiz eta oraindik ez diren ohitu egun bakoitzean herri batean egotera, "denborarekin ohituko gara, zeren azkenean antzerako gauzak egin behar ditugu bai hemen, Urretxun, edo Elgetan".

Eginbehar berriak

Antzuolako epaitegiko lanak betetzear gain, bi langile hauek enbargoak eta halakoak egin beharko dituzte. Berrez, orain arte Bergarako Epaitegitik eramaten ziren horrelako kasuak. Norbaiti zerbait ez ordaintzeagatik etxea kentzen diotela edota zigor moduan euren ondasunak enbargatu behar izatea ere bi langileon lana izango da. Asunek dioenez "norbaitengana joan eta bere etxetik al-



Bake Epaitegiko langile berriak

de egin behar duela esatea oso gogorra da; orain Urretxun enbargu bat egin behar dugu eta horrekin pentsatzen aritzen zara denbora gutzian".

Egueneroko lanak

Amaiak eta Asunek oraindik ez dute herria ondo ezagutzen eta berdin gertatzen zaie Urretxun eta Elgetan; baina hiru herrietan portzentaia berean egin behar izan duten diligentzia bat aurkitu

dute: izen aldaketa eta izen edo abizenak euskal grafian jartzea. "Gehiago edo gutxiago baina lana antzekoa da hiru herrietan; hala ere gehien egin duguna izen aldaketak izan dira, eta abizenak eta izenak euskal grafian ipintzea".

Euskaraz lan egiteari buruz, biek adierazi dutenez, "justizia administrazioa oraindik ez dago euskaraz lan egiteko prestaturik, idazkiei dagokienez behintzat; hala ere denborarekin lortuko dela uste dugu".

■ ■ ■
Amaia eta Asun Udaletxean egongo dira
egenero 9:00etatik 14:00ak arte
■ ■ ■

Gaztetxeko arduradun berriak

Joan zen zapatuan, urtarrilak 31, Gaztetxeko arduradunak hautatzeko bozketa egin zen. Bi talde aurkeztu baziren ere, orain arte egondako 5 lagun eta beste hamar berri sartuko dira urtebeterako. 18-19 urte arteko gazteak aurkeztu ziren. Orain arte egondakoen esanetan "merezi du hemen aritzeak, baina urtebete nahikoa da; gainera gazte guztiek egin beharko lukete urte bat hemen". Hala ere, Asanblada baten beharra somatu dute orain arte Gaztetxean lanean jardun dutenek. "AGAk mugitu beharko luke Gaztetxea eta ez barrakoek, bestela, arriskua egon daiteke barrakoak alde egitean mugimendurik gabeko Gaztetxe batekin gelditzeko".

Arduradun berriak Gaztetxea pintatu eta gero hasiko dira lanean, horretarako otsaileko bigarren astean Gaztetxea itxiko dutela adierazi digute.

Gazinema

Otsailaren 6an, eguakitzan, 22:00etan *Broken Arrow* filmea ikusi ahal izango da eta domekan, otsailak 8, 16:30etan *Napoleón (el perrito valiente)*. Hurrengo asteko eguakitzean, otsailak 13, 22:30etan 2013: *Rescate en L.A.* filmea emango dute Gazinemakoek eta domekan, otsailak 15, 16:30etan *Libera a Willy 3*.

Mendian seguru ibiltzeko ikastaroa Pirinioetan

Arrolak otsailaren 28, zapatua, eta martxoaren 1erako, domeka, elurretan granpoiak eta pioleta ondo erabiltzen ikasteko saioak antolatu ditu Telera mendian Federazioarekin batera. Izena ematea otsailaren 11 eta 12an Arrolaren lokalean. Ikastaroa 7.500 PTAn izango da, baina ikasleentzako prezio berezia jarriko dutela adierazi digute Arrolakoek.

San Blasak Basalden

Belarra moztu, ermita eskobatu, bankuei argizaria eman, altarea garbitu, santuari hautsa kendu... Dena prest dago otsailaren 7an opilak bedeinkatzeko San Blasako ermitan.

Bi urtean behin maiordomoa aldatzen da Basalde auzoan eta berau izaten da San Blas txukuntzeaz arduratzen dena. Bigarren urtez Alzetakoak dira maiordomo. Hala ere, Aloña, Ana, Angel, Bittori, Bittor, Ester, Irune, Isabel, Mari Karmen, Mirari, Jesus, Jose Luis, Jose Mari, Julian eta Pakita aritu ziren joan zen zapatuan ermita gertatzen. Ondoren, Tomasak prestatu ohi duen txokolatea meriendatu zuten. Txokolateaz gain, ohitura da Aitzabasaldeko Tomasak untzarekin koroa egitea San Blas.

Meza ostea

Meza ondoren, ermitaren aurrealdean, taberna ipiniko dute auzokoek eta bertan, Egurrabei eta Alzetan egiten den salda eta Aitzabasalden egositako txorizoa dastatzeko aukera izango dute

bertaratzen diren guztiek. Ogia ere garai batean bertan egiten zen, Galardin, baina orain dela lau bat urtetik hona kaletik ekarri behar izaten dute.

San Blas eguna otsailaren 3an izan bazen ere, zapatuan ospatuko dute Basalde auzokoek. Bazkari berezia egiten da auzoko baserrietan eta kalean bizi diren senitartekoak gonbidatzen dituzte. Herriko abadea maiordomoaren etxean gelditzen da bazkaltzen.

1802tik San Blas izenaz ezagutzen den ermitak, zapatuan, hilak 7, zabalduko ditu bere ateak, katarroaren eta ezterriko minaren aurkako kandelak pizteko eta hain ezagunak diren San Blas opilak bedeinkatzeko.

Santa Ageda Galartzan

Galartza auzokoek Santa Ageda eguna ospatuko dute domekan, otsailaren 8an. Eguerdian meza izango da eta horren ondoren, 12:30ak aldera, salda, ardoa eta pintxoak eskainiko dizkiete bertara joaten diren guztiei. Gainera, trikitilariak ere izango dira giroa alaitzen.



Basalde auzokoek San Blas txukuntzen.

igor eta Txomin

Pintura orokorrean.
 Paper, tela, binilo, kortxo... estaldurak.
 Gotelesa, iztukuak eta
 bestelako imitazioak.

ANTZUOLA BERGARA
 ☎ 76 60 39 ☎ 76 19 98

ANTZUOLAKO BASERRIETAKO
HARAGI
 NATURAL ETA ONENAK

Juan Jose AGIRRE

Kalebarren 1, ANTZUOLA Tf.: 76 64 84

GOROSTI
Taberna

☎ 76 62 96
 Zurrategi plaza ANTZUOLA

Aiherra kalea Antzuolan

Kalebarrengo etxe berrien kalea Aiherra izendatu dute. Pasa den urtarrilaren 20an egin zen udalbatzarrak aho batez hautatu zuen Aiherra izena, beste hiru izenen artean. Horietako bat San Bartolome zen, Kalebarre-
ren zegoen ermitaren izena hain zuzen ere.



Patxi eta Pollero trasladatuak

Juan Jose Aranburu eta Patxi Olabarria kartzelaz aldatu dituzte. Madril jarraitzen duten arren, Pollero, Valdemorotik Soto del Real kartzelara eraman dute eta Patxi, berriz, Alcalá Mecotik Navalcarnera.

Bideoa Gaztetxean

Datorren domekan, otsailak 8, Antzuolarron Independentzia Eguneko irudiak eskainiko dira Gaztetxean 18:00etan.

Berrigara gidak

1998ko Berrigara Gida jaso ez duenak, liburutegian eta Kontuolan jaso ahal izango ditu otsailean. Antzuola eta Bergarako denda, taberna, espresa eta antzekoen telefonoz gain, partikularrenak ere badaude.

Arratetik Kalamuara

Otsailaren 22an Arrate Kalamua mendi iteeran parte hartu nahi dutenek, otsailaren 16an eman beharko dute izena, 19:00 etatik aurrera Arrolaren lokalean.



Uzárraga eta Zumárraga

Foru Aldundiak ipini berri duen bide-seinaleak komentario bat baino gehiago sortarazi du herrian. Dagoeneko Antzuolako Udalak deitu du Diputaziora kexa aurkezteko. Matz-Erreka pareko seinalea gaztelaniaz dago nahiz eta bertsio ofiziala euskaraz izan.

GURE ARTIAN

San Blasetan opila bedeinkatzera joaten al zara?



Antoni Zubikarai

Urtero juten naiz bost bat opillekin, bakoitza bere serbilletiak lotuta, guriak eta amanekuak. Kandelua pizten dot katarruandako eta karameluak pe eruaten dittut.



Igor Lezeta

Txikittan juten nitzan nere ogixakin. Baiña etxaten gustatzen ogixa jatia, gogorra egoten zan eta bakarrik probatze-ko jaten neban. Oin ohian geratzia nahixao dot.



Miren Aranguren

Batzutan juten naiz. Lagunekin jutia gustatzen jat. Opilla eskuan eruaten dot eta uste dot gusto diferentia eukitzen dabela. Aurten ogixakin karameluak eruango dittut.

ANTZUOLA

Apainketak eta isolamenduak
Pladurrezko dibisioak

Kalegoi 21 ANTZUOLA
Tf.: 72 30 05
Biltegia: 78 70 40

EGAÑA

Era guztietako arotz lanak

Tarima eta parketa jartzea
Zoruen kutxilatu eta barnizatuak

Kalegoi 21, ANTZUOLA Tf.: 76 64 23

GAILUR

taberna eta
gozotegia

Buztinzuri 13 ANTZUOLA
Tf. 78 70 32

Santa Ageda eskian

Hemezortzi urte beteko dituzten gazteak etxez etxe eta baserriz baserri ibili ziren eguaztenean, otsailaren 4an, Santa Ageda bezperan, kantuan eta eskean. Ohiturari jarraituz beheko zein goiko baserri batzuetatik pasa ziren goizetik, eta eguerdirako kalera etorri ziren bazkaltzera.

Aitor, Ion, Ibai, Urko... gutzira hamabost lagun eta lau trikitilari aritu ziren "Santa Ageda bezpera degu..." abesten. Ilusioa zuten egun hau iristeko, "beti esaten da juerga haundixa dala, egun dana etxetik kanpo eta gaba be bai..."

Zortzi lagun joan ziren goiko baserrietara eta zazpi behekoetara. Guztira 80 baserri dira. Behera joan zirenek ibilbidea azaldu ziguten; "lehenengo Etxezuri eta egitten dira; gero Beteixotik Gorla azpira jun eta Ugarrixan kantau. Bergarara ailegatuz hamarretakua egitten da Euzkitzan. Kamiñotik bueltan, Bekorrotta ta, eta gero bazkaltzera. Arratsaldian, Azkarate eta Ireta pasau eta Jauregittik, Lizarragara jeisten da".

Non elkartzen zarete gora eta behera joandakoak?

Bizkalatza azpitan alkartzen gara normalian. Txanbolin, Torre eta Anbu basarrixak batera egitten die eta gero kalera etortzen gara danak batera.

Garai batean ateratzen zen dirua soldadu joateko izaten zen, orain, ordea, ez zarete inor joango; zer egiten da batzen den diruarekin?

Bai, teorixan dirua soldauzkara juteko zan baiña oin insumiso egin eta abogaua pagatzeko erabiltzen da -barreak-. Dirua zenbat etaraten dan eztagigu, baiña bai zetarako ailegatzen dan. Bergaran poteau egitten da baiña taber-

narixak erak pagatzen dabe. Bazkaixa eta afarixa debalde irtetzen jaku etarutzen dogun diruakin, eta eguneko edana, Idiazabaleraiñoko autobusa eta bertan gaba pasatzia be diru horrekin egitten da; gaiñera, igual beste afari bat egingo dogu sobrautako diruakin.

Entseurik egin gabe, goizeko seletan atera ziren plazatik petardoak bota ondoren.

Egunian bertan ensaiatzen da; etxian ikasi egun bat lehenago eta aurrera. Segiduan ikasten da, gaiñera hiru estrofa die bakarrik, bat kalerako eta bi

basarritarako. Urtian zihar basarriren batian hildakoren bat egon bada, han ezta kantatzen, errezauegitten da. Aurtan bai goixan eta bai behian, biña basarritan egin biharko dogu errezaue, goixan Arlutz eta Ertzillen eta behian Jauregi eta Ugarrixan.

Urtero egoten da kinto egunean kanpotik etortzen den norbait; zuek ere ba al duzue kanpoan bizi den kintoren bat?

Bai badare baiña eztaoz. Bost lagun die; Deskargakua, Gasteizko bikiak, Olaortuanekua Bartzelonan eta Mallorkan beste bat.

Aspaldian neskak ere egoten dira euron kintoekin Santa Ageda bezperan.

Afalosteko kafera etortzen die normalian.

■ ■ ■
 "Urtian zihar basarriren batian hildakoren bat egon bada, han errezauegitten da"
 ■ ■ ■




Kintoek gogotsu jardun zuten kantu-kantari.

LARREA

TABERNA

Kalebarren 17
 ANTZUOLA



Z Zabalo Iturgintza S.L.

Bidea eginez

Tailerra: Uzarraga bidea 10. Tf. 78 71 78

Erakusketa: Kalebarren 1. Tf. 78 71 79, Tf. eta F. 76 64 73

- Gasa
- Berogailuak
- Haize egokitua
- Enpresen mantenimendua
- Lurrin instalazioak
- Bero-aurreztea
- Bainugelak. Proiektuak momentuan egiten ditugu DIBaren bidez
- Birgaitze-espeditentak bideratzen ditugu